

Iudas (o Iud) Ĝena Toretore

Iudas (o Iud) vaĝa-foforina guruĝari

Mai fefa tu Iudas (o Iud), Iesu tarina, na etoreato. Mai fefa tu ekalesia mabarari ĝeri.

Iudas na mai fefa tu laĝani 65 ma 70 fakari nuĝanai ta etoreato, mo tu Iesu emaseto murinai.

Siri baregona tu siri 3.

Iudas na mai fefai ekalesia mabarari ekirarito, 1) ĝeri veĝabidadamai beĝene ruĝa-gwaĝiĝi; 2) beĝene venari, apostolo ĝofaĝofari na beĝe ĝofa-vegonurini garina; 3) Barau ĝena vevaĝa-riba guruĝari beĝene korana-iaĝiri.

Iudas na mai fefa tu maiĝesina eboioĝaiato:

1. Veĝabidadama na ĝeveĝitani tarimari ĝeri veiĝa - siri 1-16
 2. Veĝabidadama beĝene ĝabi-gwaĝiĝia - siri 17-23
-

¹Au Iudas, Iesu Vereĝauka ĝena vetuĝunaĝi tarimagu, ema Iakobo (o Iames) tarina, ĝeguna mai fefa eiaĝosini. Gomi Barau na ekeamito tarimami, Tamara Barau na eura-vinimini ema Iesu Keriso na eĝita-ĝaumini tarimami, atore-vinimini.

²Vevetuĝaĝwa, maino, ema veura-vini na boĝono vonuvonu-raĝe.

Vevaĝa-riba tarimari ĝofaĝofari

³Ĝatagu mabarami, ĝegu ura baregona ĝera vevaĝa-maĝuri dabarana guruĝana bana tore-vinimi atato, senaĝi au na aĝitaiato, namona tu ĝegu fefai bana launaĝimi, Barau ĝena veaĝa tarimari evinirito veĝabidadamana boĝono ĝabi-gigitaria. ⁴Korana tarima kotari, Barau asi ĝekorana-iaĝiani tarimari, tu vekure-toĝai ĝomi fakami ai ĝerakatoĝa-ĝairito. Maniĝeri tarima na tu ĝita ĝera Barau ĝena varevare-bara ĝeĝabiani, ĝia ĝeri veiĝa rakavari beĝene veiri ĝana dabaranai ĝevaĝa-iaĝoani, ema Iesu Keriso ĝera Vereĝauka e Vere Baregona sebona kwariĝutu moĝo ĝekira-fitoĝaiani. Barau na kai-veĝata ĝena bukai etore-vanaĝiato, ĝeri rakava voiri beĝe doĝaririni.

⁵Gomi Buka Veaĝa variri mabarari ĝoriba-guinerito, senaĝi auran na navaĝa-riba ĝenoĝoimi, Vereĝauka na Isaraela tarimari tu aiĝesina evaĝa-

maḡuririto Aigupito tanona na, senaḡi murinai asi ḡevaḡa-moḡoniatu tarimari tu ma evaḡi-maserito. ⁶Aneru tari maki ḡotuḡamaḡiri, ḡeri dagi korikori asi ḡeḡabi-gwaḡiḡirito, ema ḡeri tanu gabuna ḡeraga-kwaneato. Moḡa lorinai Barau na mukuna gabunai etorerito, tanu-vanaḡivanaḡi seiniri na ebaru-taririto, ḡena Kota baregona ḡarona ḡana. ⁷Sodoma e Gomora, ema seviri ai taoniri asi boḡono tuḡarekwari. Moḡeri tarima ḡeri veiḡa maki aneru ḡeveito veigari kavana ḡeveirito, ḡemata-boraḡato e veiḡa boraḡari ḡeveito, benamo tanu-vanaḡivanaḡi karavana na eḡararito, mo tu ḡita ḡera ḡitaḡita ḡana.

⁸Moḡesi veiḡa ilailanai, mo nuvi tarimari na maki tauḡeri tauḡaniri moḡesi ḡevaḡa-rakavarini; Barau ḡena maoro ḡekira-fitoḡaiani, ema iauka baregori ḡevei-veḡare veḡarerini. ⁹A Maikolo, aneru mabarari ḡeri vere ta, Diabolo ḡesi ḡevevaneto, Mose tauḡanina dei na bene ḡabia ḡaramanai nai, Maikolo na Diabolo guruḡa rakavari na asi evaneato, senaḡi ekiraiato, “Vereḡauka na bene kira-feimu!” etato. ¹⁰Senaḡi moḡeri tarima tu asi ḡetuḡamaḡi-maḡatarini dagarari ḡevei-veḡare veḡarerini; ema ḡeri vemamiraḡi ai ḡeribarini dagarari bai kavari, moḡeri dagara na ḡia ḡevaḡa-rakavarini. ¹¹Vetuḡari kika! ḡia tu Kaino ḡena veiḡa beḡe ḡabia. Balam ekerereto kavana farefare boruri ragari beḡe vei. Kora eseḡa-foreto e tauḡena evevaḡa-rakavato kavana ḡia maki beḡe seḡafore e tauḡeri beḡe vevaḡa-rakava.

¹²Moḡeri tarima ḡomi ḡemi ḡanivegogo ḡoveirini nai, ḡia tu miro noḡa ḡomi fakami ai. ḡia tauḡeri moḡo ḡevetuḡamaḡikauni. ḡia tu magube asi ḡurari, iavara na eḡwa-rakaorakao-kavarini kavana. Ema ḡau korukoru meramerai maki asi ḡwaḡwana kavana, ma ḡokaḡokari ḡelau-raḡerini, ḡemase-vaḡa-ruaruani. ¹³ḡia tu davara ureureri na kaburo-buro ḡefoforini noḡa, ḡeri maiaka veigari ḡefoforini. ḡia tu ḡeri dabara ḡeraga-kwanerito visiḡuri kavana, Barau na mukuna furufuru gabuna ḡeri etoreato etanu-vanaḡi vanaḡini.

¹⁴Adamu besena vaḡa-imaima ruaruana (7), Enoka, ḡia na moḡeri tarima eperoveta-iaḡirito, ekirato, “ḡoboḡe, Vereḡauka tu mai eiaḡomani ma ḡena aneru veaḡari asi gadaragadara ḡesi, ¹⁵tarimarima mabarari vevaḡa-maoro bene viniri ḡana. Barau asi ḡekorana-iaḡiani tarimari ḡeri rakava nuḡanai Barau asi ḡekorana-iaḡiani veigari ḡeveirini, ema veirakava tarimari, Barau asi ḡekorana-iaḡiani tarimari, na Barau guruḡa rakavari ḡeviniato, mabarari ḡeri veirakava voina bene kiraḡiri ḡana.” ¹⁶Moḡeri tarima tu mugumugu e veroritore moḡo ribari. ḡia tu ḡeri ura rakavari ḡeiaḡo-vinirini, tauḡeri ḡevevaḡa-raḡeni ema tarima tari ḡevaḡa-namo ḡofa-kaurini ḡia tauḡeri namo beḡene doḡari uranai.

Velaunaḡi guruḡari

¹⁷Senaḡi ḡomi, ḡatagu mabarami, ḡera Vereḡauka Iesu Keriso ḡena apostolo na ḡevaḡa-guruḡamito guruḡari boḡono tuḡamaḡi-taḡori.

¹⁸Ĝevaĝa-guruĝamito, ĝekirato, “Ĝaro dokori ai vei-veĝareveĝare tarimari beĝe fororini, Barau muriri ai beĝe toreani, benamo ĝeri ura rakavari beĝe iaĝo-vinirini.” ¹⁹Moĝeri tarimarima na ĝomi fakami ai vetavi-kirakira ĝevaĝa-ĝoraiani. Ĝia tu ĝeri ura rakavari na ĝeguine-iaĝirini. Iauka Veaĝa ĝia ĝeri ai maki asiĝi.

²⁰Senaĝi ĝomi, ĝatagu mabarami, ĝemi veĝabidadama veaĝana boĝono ĝabi-gigitaria, ma iatanai ĝemi maĝuri boĝono tore-varaĝea. Iauka Veaĝa seĝukanai boĝono ĝauĝau. ²¹Barau ĝena veuravini nuĝanai boĝono tanu ema ĝera Vereĝauka Iesu Keriso ĝena vevetuĝaĝwa boĝono naria, korana ĝena vevetuĝaĝwai maĝuri vanaĝivanaĝi bevinimini. ²²Ĝetuĝamaĝi-iauvoiauvoni tarimari boĝono vetuĝaĝwari. ²³Tarima kotari karava nuĝana na boĝono inu-vaĝiri, boĝono vaĝa-maĝuriri. Ma kotari boĝono vetuĝari, senaĝi ma garimi ĝesi, ĝeri miro na beĝe vaĝa-rakavamini garina.

Barau vaĝa-raĝena ĝuriĝurina

²⁴Barau na benarimini riba, benamo asi boĝo ketoni, ema ĝia ĝena mareva baregonai bea toremini asi vetoukaumi e ma iakumi ĝesi. ²⁵Ĝita ĝera Barau sebona, ĝera Vereĝauka Iesu Keriso bakunai evaĝa-maĝurirani Barauna, bitana vaĝa-raĝea. Ĝia tu iaru-korokoro ma marevana baregona, kokore e seĝuka mabarana tu ĝia ĝena, toma bene iaĝo vanaĝivanaĝi! Amen.